

國朝耆獻類徵初編卷四百五十一目錄

卓行九

張良伍

祝曰三

史三畏

呂尚義

吳文玉

馮震生

陳確

弟端和本初

李文科

譚士元

何祖柱葉大緣

程浚

張勿我

趙鯉詔

潘秉鈞

程國明

吳璟

吳鴻錫

陳世珮

楊寓乾

程增

劉毓英

言然

桂貴

楊繼玉

江文樂

國朝耆獻類徵初編卷四百五十一

通奉大夫前署江西巡撫江西布政使司布政使湘陰李桓輯
卓行九

張良伍

嗚呼此有清節士張公葆孺之墓也予嘗聞公之行事不獲見其
人其孫漢出吾門讀所爲公狀慨然想見其生平未嘗不激昂奮
發興起其志氣而嘆士節之不可不砥也公諱良伍葆孺其字也
又字允侯號黃石其先蜀之巴縣人始祖均德爲元明威將軍入
滇家石屏州世有隱德曾祖汝橋舉鄉飲大賓祖煜然歲貢生官
訓導父一甲明崇禎庚辰進士累官太僕少卿贈大理卿妣王淑

人公生而岐嶷篤學有志尙入郡庠食餼性善飲可一石至醉則豪吟睥睨旁若無人教子若孫講讀遵大理公家法足不履公門士以此重之吳逆之變建僞號開科趨仕者如鶩公避居山村中飭諸子勿應試僞有司偏之力告養母不出後五年王淑人卒論者高其節且服其先識云今夫平居談節義章縫輩類能津津齒頰間或語友逆節輒裂眦詆罵不使齒於人此非必盡僞亦天性然也一旦時窮力迫搖搖然視其身如懸旌惟風飄所左右齷齪者無論已卽一二自好者亦不克反眾獨立矚然自拔於塵塗之表然則士之克以節見者鮮矣至若分符守封疆爲天子死其職如顏魯公之使李希烈段太尉之擊朱泚前史亦難之況以天末

儒生去京師萬里官籍未通身家可念且際乎顛沛之頃者哉予所以表公之墓不禁三致意於士節之難全也公年四十應明經至七十恂恂如童穉嘗以善退爲學志不欲上人若無有甚異者顧其於忠孝大節確乎有不拔之操而天亦若善祐之俾其兩全無遺憾非積善有餘慶者而能若是乎往聞吳逆變時甘忠果公文焜及馬文毅公雄鎮先後皆致命遂志至胡尙書兆龍初爲漢中副使道聞難時匿其印於稻畦身爲酒家傭卒用自晦以全臣節斯亦奇矣易曰過涉滅頂不可咎也曾子稱臨大節而不可奪若忠果公三人者或以死事成仁或以匿身免亂事不必一轍然皆表暴於世荷 國家殊恩封馬鬣普通顯可不謂榮焉若我張

公一介砥節不求聞於當世世亦鮮知之顧使其名湮沒而不彰
非後死者之責哉公生明天啟甲子卒康熙戊寅得年七十有五
葬鄉飲公墓側卒後五年始授南甯訓導配許氏有淑德與公同
穴子五人德宿景宿吉宿台宿元宿女一孫十二人自景宿出者
曰漢 萬壽科進士由翰林院庶吉士授檢討嘗爲予述公軼事
乞表其墓且曰公承家五十年不替先德易簀時謂子孫曰吾今
乃然後可見吾祖若父於地下矣其守身以事親如此嗚呼此其
所以爲節士與

右墓表呂履恆撰

祝曰三

祝曰三佚其名故相國高公宏圖家僮也明亡相國時已致仕寓會稽野寺中聞變不食家人環泣請不顧已而開目索飲祝年十二侍於旁進曰大人幸復食飲可惜枉餓過三日公領之遂閉目絕粒九日卒相國之支族將軍文熠微時與祝兄弟交命子孝廉某呼祝爲丈往來侍酒跪起如子姪將軍都統江西孝廉初得舉倨貴家居廣開亭館置姬妾日夜飲酒高會將軍年老思子不時至親友皆勸駕久之未有行意祝聞之晨往孝廉飲倦臥敲枕使兩女子捶臂召見祝坐對牀都不言但抗喉高歌蔡公思子一闋畢遂趨出孝廉卽日束裝祝隨至南昌將軍歡甚贈衣一襲精於

繪事寫人物如生嘗爲先方伯公作黃山五老圖方伯贈以詩鄉人重其義所至延爲上客

右書事法坤宏撰

史三畏

公名三畏字兆益行二子文其號也曾祖荆西累贈承德郎伯祖來廷奉政大夫戶部浙江司郎中祖振西父采于公少英特學業尤純泊鼎革後年三十餘矣應試爲諸生遂廩於庠年五十餘貢於成均文名蔚起大江南北爭欲師事之由邑中巨室暨泰州諸名族前後授徒以百計藉公成名者甚眾若乙未進士杜汝用亦其一也公性孝友父采于喜豪俠客常滿座旨酒嘉蔬日夕求諸市而仲弟睿庵幼而蕩狎母孺人憐愛之所費不支咸待給於公公之脩脯任其取攜弗計也故授經四十餘年而產輒不豐然公亦安其貧未嘗以利祿爲念其貢於成均也嘗一試於吏部得高

國朝書牘卷四十五
等例入銓以金進不獲仕而歸後以喪明之戚遂絕意進取當事者再三聘卒不出嘉會熊公爲吾郡司馬以觀風拔公第一後署邑篆屢招公公執義不往後有富人爲盜所誣諸勢紳白其枉弗聽一老胥導之覓公公亦知其冤爲言之熊事得釋富人重賄公公悉予之老胥曰吾動於義勿以財帛溷我其廉介多類此公家法尤嚴殺子卒訓孫不少懈雖盜無餘粟而課經訂史無虛日居鄉剛方直諒一言出人服其義里人爲擣菹之戲公力禁之終公之世無敢偶犯者當鼎革時羣盜四起然皆以義兵爲名里中少年見獵心喜學弄戈矛朝夕譁鬪而公讀書凌霞觀蓬扉老屋中哦聲不絕族人有號三將軍者膂力絕人始肩一礮捍鄉里盜不

敢近旣而起爲盜魁以軍法部勒之將收爲新市平林之用時來
謁公謂曰大江以南狐鳴鹿走正少年撫髀鼓掌之秋也澣統小
技可立大功讀書奚爲哉今桃溪盧家起兵吾欲附之公能從我
乎公曰吾自視無所長聊以書自適耳桃溪雖以忠義起兵然皆
烏合之眾一遇大師勢必瓦解昔馬文淵慷慨多大志而從弟少
游但願鄉里稱善人吾竊慕其風騎款段乘下澤優游以老足矣
若等仰視飛鳶墮水時當亦念吾語也將軍笑而去其後盧軍潰
中書公殉節於五湖悉如公言公年八十精力倍少齒落更生年
九十嫺黨畢賀公鶴髮童顏應接不倦先是公子湘芝卒媳裴孺
人亦卒長孫源長方五歲次孫源清甫三歲公以白髮一老人提

攜二孤艱辛百端門祚不絕如綫至是長孫已補博士弟子員次
孫亦英俊卓傑爭雄藝苑而曾孫三四人皆衣冠趨拜濟濟盈庭
眾賓歎息咸以爲積善之報公年九十一而卒公初娶劉繼吳次
戴次陳公始得劉孺人之力內顧無虞其館於秦也父采于甫卒
劉孺人繼之家四壁立子湘芝纔七齡將攜之北行而費用乏絕
貸於族之豪者弗應罄其囊得米數升與蒼頭作飯食訖懷其餘
負湘芝登舟比達秦絕糧逾日矣晚年家稍裕然好施予惡殺生
恩及螺蚌貧不能炊者輒量給之有田二頃其田租半爲佃民所
負亦弗之偏也故人皆德之仁慈之聲播於遠邇三將軍者名誠
字彬若行三於公爲從弟多力善鬪一振臂百人胥廢然事母至

孝聞母聲息卽束手斂容弗敢動其爲盜魁也約束嚴甚不得妄殺人行剽所至富家鼠竄而貧民多受其惠者以故人亦德之王師下江南易置郡縣長吏將軍率其黨攻金沙城破之聞桃溪軍盡殲憤甚獨身持礮閒行至邑夜伏水關下平明有朱纓者六人騎而過焉礮發馬驚顛二人溺水死聲栗聲大集悉張弓射將軍背中六七矢卒游涌而逸及天下大定遂散黨棄戎服以屠牛爲業縣令械繫之然鎧於其乳將軍大笑色不變隆冬夜雪赤身束縛置庭下將軍鼾睡聲如雷雪無一跡令大駭異亦素聞其孝義歎曰壯士不可殺遂縱之歸以壽終當是時將軍以勇聞公以仁著迄今數十年里人追談往昔輒齒二人不置而尤爲公先屈

一指云

右傳瞿源洙撰

呂尙義

大庾縣民呂尙義世居南源山下其地在大庾崇義二縣之間土田肥美然界連廣東層巒峻嶺山有錫礦礦徒出沒峒老則亡爲盜賊剽劫村莊人莫敢居惟尙義結廬其下數十年賊莫能害尙義與妻俱善用鳥槍發無不中施放尤敏十步可放三槍每遇賊至夫婦二槍連環不絕歲殺賊無算賊恨尙義刺骨康熙四十年有廣東萬猴山賊渠藍某率賊二百餘人白日持槍礮過大庾嶺昌言將往南源殺尙義復仇南安參將營兵莫敢阻拒聞之賴鎮楊鈞隨遣二守備率兵數百人往捕比至南源則賊已爲尙義擊敗竄匿山谷矣時尙義妻已沒一女亦能用鳥槍父女二人共殺

賊五十餘人其餘匿山谷者尙未解散官兵以林深箐密莫敢搜捕尙義慨然前行曰第隨我來賊可盡得尙義鷹目洞微見遠茅草中有伏賊百步外能見之發槍卽中咸驚起遂踰山以逸官兵環視不敢捕惟得沙礮三位而還崇義高令尙瑛召尙義至衙予酒食賜銀欲署爲捕頭大庾令亦欲委之彼此列狀爭於府蓋二縣俱有山賊惟尙義所在則賊不敢犯也尙義俱謝不受委曰吾農民不願充役但兩縣官長爲安靖地方計吾所居在兩縣間何敢辭勞南源一帶吾女在可無事其餘兩縣地方但有山賊吾願隨官兵往捕賊聞吾至卽逃矣於是兩令大喜厚賜而遣之然廣東曠賊自是役大創亦不復至南安云時鑲紅旗祝公鍾賢爲南

安守公子兆龍親見其事兆龍與余同在八旗志書館爲余言其
端末如此余惟古稱弧矢之利以威天下至兵刃既接則有以氣
與力爲強弱者自明之初年西洋火器入於中國遂爲軍中無敵
之技雖由基之巧項羽之氣烏獲之力一烏槍殺之有餘矣雖然
習其技者貴精主其事者貴勇技不精則心手不相應施放鈍拙
不足以制弓矢志不勇則臨敵倉皇失措往往棄利器爲敵用若
呂尙義父女二人烏槍可連環不絕技旣甚精以二人當二百餘
人而氣定神閒不爲賊亂則勇亦殊絕使天下爲將弁者盡得尙
義輩效馳驅豈不皆精兵哉兵不必皆精而尙義輩特以山居老
余故爲太息而記之